

Innuttaasut immikkut tamarmik kiassarnermut atukkaminnik taamaallaat akiliisaleqqullugit, Nukissiorfinnit kiassarneqartut tamarmik immikkut uuttuutilersorneqarnissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamanna aallarteqquneqarpoq kingusinnerpaamik ulloq 1. januaari 2017.

(Inatsisartuni ilaasortaq Michael Rosing, Demokraatit)

Akissuteqaat

(Pinngortitamut, Avatangiisinut Inatsisinillu Atuutsitsinermut Naalakkersuisoq)

Aappassaanneerpeqarnera

Naalakkersuisunit Sanaartornermut Ataatsimiititaliaq immikkut kiassarnermut uuttuusersuinissamut siunnersuummik suliaqarneranut qutsavigaarput.

Naalakkersuisut *"toqqorterisutullusooq isumaat, tassaasoq Namminersorlutik Oqartussat pigisaani aalaakkaasuni tamani immikkoortitaartumik kiassarnermik uuttuusersuisoqarnissaanik isuma"* pillugu Sanaartornermut Ataatsimiititaliamit uparuarneqartut, Naalakkersuisunit maluginiarneqarpoq. Naalakkersuisut allannguutissatut siunnersuutaat isummanik toqqortikkanik, imaluunniit immikkut kiassarnermut uuttuusersuinissamut akornusiisutaasussanik sukkulluunniit imaqanngilaq. Taamaallaalli aalajangiiffigisassatut tunngavissat torersuunissaat paasiuminartuunissaallu siunnerfigineqarpoq.

Naalakkersuisunit ataatsimiititaliap oqaaseqaataanit amerlanerpaat taperserpeqarput. Sanaartornermut Ataatsimiititaliap allannguutissatut siunnersuutaanut, nassuiaatip nunatsinni uunnaaveqarfiit kiassaateqarfiillu tamarmik qaqugu INI A/S-imit, Namminersorlutik Oqartussat inissiaqarfiinit, Mittarfeqarfinnit il.il. Nukissiorfinnut tunniunneqarsinnaaneranut piffissamut pilersaarummik imaqarnissaanut tunngasumut atatillugu Naalakkersuisut torersaarnissaq eqqarsaatigalugu erseqqissaatigissavaat, apeqqut taanna aalajangiiffigisassatut siunnersuummi taasiffissat avataanniimmat.

Sanaartornermut Ataatsimiititaliap allannguutissatut siunnersuutaa akuerineqassappat, Naalakkersuisunit suliap ilagiinnagaatut tunniussisoqarsinnaanerani aningaasaqarnermut suliassanullu sunniutissat misissorneqassapput. Taamaattumik Naalakkersuisut Sanaartornermut Ataatsimiititaliap allannguutissatut siunnersuutaanik ingerlatitseqqinnerannut peqatigitillugu, uunnaaveqarfiit kiassaateqarfiillu ullumikkut immikkoortunut imminnut ingerlattunut ilaanerat ataqqillugu suliat ingerlanneqassapput. Piffissaliussap, allannguutissatut siunnersuummi allassimasup malinnissaa Naalakkersuisunit anguniarneqassaaq.

Taamaattumik matuma siuliani oqaaseqaatigineqartut tunngavigalugit Sanaartornermut Ataatsimiititaliap allannguutissatut siunnersuutaat Inatsisartunit taperserneqassanngitsoq, Naalakkersuisullu allannguutissatut siunnersuutaat akuerineqassasoq Naalakkersuisunit inassutigineqassaaq.